



史地小叢書

中國秘密社會史

平山周著

商務印書館發行

平山周著

史地
叢書

中國秘密社會史

商務印書館發行

敘言一

會黨初起。蓋在兩漢間。然非素有造意者。赤眉銅馬。迫飢寒相走集。及黃巾五斗米道之興。其情異矣。唐宋間多名爲社。白蓮教者。亦自蓮社造端。是以有香軍之目。值胡元猾夏。民心思宋。故其教兼爲種族。王道凌遲。政失其緒。亦有屯聚以抗官吏者。無爲聞香諸教自明始也。要之比傳釋道。人易信從。訖明之亡。子遺黃髮。謀所以光復者。是時鄭成功在臺灣。閩海之濱。聲氣相應。熊開元汝應元。皆以明室遺臣。祝髮入道。故天地會自福建來。其後乃有哥老三合。專務攘除胡貉。而與宗教分離。扶義倜儻。不依物怪。視白蓮諸教爲近正。民者生而性惡。不有懾其志者。值窮饑則恆心少。起爲盜賊。猶可原也。又乃詐僞接搆。自相殘殺。其行義又不逮白蓮。故務民與敬鬼神。得失相庚。在互輔其短而已。日本平山周遊中國久。數與會黨往復。於中國之祕密結社。彙而誌之。蓋其情僞織悉盡知之矣。余念會黨各爲部伍。符號儀式。所在互異。其人往往不相聞知。今欲集合會黨。非直因成法利導之也。又將參而伍之。

去其泰甚。補其缺遺。不有是書。將何以徧照哉。草創既成。適有身毒君子欲觀支那結社情狀。余因勸周函付排印。宣達斯事。至於斟酌損益。存乎其人。

敘言二

吾友古研氏既集合支那三合哥老諸黨會之歷史行事。著爲書。屬余爲弁言簡端。乃言曰。異哉。讀支那歷史。自秦漢以降。上下二千年間。革命之事殆居十三四。蓋未嘗不與祕密結社有因果關係也。新室不弔。綠林諸英。揭竿起於草澤。白水真人。乃爲天子。卯金之數將終。三十六方黃巾擾之。則兆三分之局。楊隋之衰也。瓦崗諸羣首難。而有唐以受命。元之亡。以燒香聚衆之徒徧天下。皇覺寺僧興焉。明末流寇海盜相繼起。八牛運盡矣。自清現治世。諸夏變爲夷狄。有明遺老逸民。思攘夷大義。爲虜埋沒。則相與結合諸黨會。冀存微旨以收功將來。是三合哥老之名所以始。厥後初作難發於臺灣。川湖陝揚導之。太平洪氏用集大成。光復之聲。果不泯墜也。蓋革命事重大。非豫爲醞釀鬱積久之。不克自發。抒者。而攘夷大義。非徒外鑠。尤需有所載之。以爲播殖也。今諸黨會。其行或不軌於正義。爲世詬病。然其富團結力。守秩序。重然諾。急公死義。不愛其身軀。心惓惓乎勝國。歷世合羣不變。希冀一當。不要有

足多乎。使再節制其羣。廣展其宗義。化而如歐美之民黨工會。其結局必有以進於新漢隋唐元明季世諸黨會之所爲。豈第爲高材捷足者驅除已哉。以是質諸古研氏。以爲何如。

桃源逸士記

目次

第一章	白蓮會	一
第二章	天地會	一一
第三章	三合會	二〇
第四章	哥老會	七六
第五章	興中會及同盟會	一四七
第六章	光復公會	一七四

中國秘密社會史

第一章 白蓮會

中國秘密結社。始於北胡侵入之後。其萌蘖遠在漢時。方前漢之末。有赤眉銅馬鐵脛綠林。與夫大槍諸賊。後漢末造。三國肇始之際。則有黃巾賊。因平黃巾賊而崛起者。則有劉備關羽張飛三傑。是三傑者。結義桃園。約爲兄弟。雖非以同年月日生。願以同年月日死。爲後世秘密結社之模式。黃巾賊後。有五斗米道。降及唐末。則有黃巢之亂。宋徽宗時。有宋公明盧俊義之徒。卽水滸傳故事。有百八徒會於梁山忠義堂。父天母地。兄弟星。姊妹月。啜血誓盟。其諸儀式。永爲秘密結社之師法。後二百年。乃有白蓮會。

宋末。陸秀夫攜帝昺走廣東。投海死。宋遂以亡。元世祖忽必烈入主中夏。及武帝死。宦官宮妾擅政。至

順帝時。黃河流域因賦役而大擾。人心思亂。至正十年。樂城有韓山童者。煽動其祖父所立之白蓮會。焚香惑衆。倡言彌勒佛降生。河南及江淮間愚民。多信之者。又有劉福通及其黨杜遵道羅文素盛文郁王顯忠韓咬兒等附益之。詭言山童實宋徽宗八世孫。應作中華正統君主。因刑白馬黑牛。誓告天地。謀起兵。以紅巾爲號。事洩。山童就擒。妻楊氏。及子韓林兒。潛逃武安。劉福通遂反。破潁州。據朱皋。陷汝寧府及光州。擁衆不下十餘萬。蕭縣李二。亦焚香惑衆。偕其黨趙均用。攻陷徐州。據之。羅田徐壽輝亦舉兵。以紅巾爲號。僧人瑩玉及鄒普勝倪文俊等。奇壽輝之狀貌。共推爲主。陷蘄水及黃州。壽輝遂稱帝。國號天完。劉福通迎韓林兒爲幼帝。稱小明王。都亳州。國號宋。世稱諸賊曰紅軍。又曰香軍。時郭子興陳友諒張士誠等。羣雄並起。先後稱王。後朱元璋統一中原。遂爲明代。

原白蓮會之起。祇韓山童等欲恢復宋室故耳。而鵝蚌之爭。終爲漁父之利。天道蓋難測也。

爾後二百年。有明鼎盛。白蓮會闕焉無聞。自宦官及寵臣專權而國政以紊。加以旱魃爲虐。饑饉薦臻。滿人乘機寇邊。內則叛亂迭生。天啓五年。白蓮會蜂起。初蘄州王森者。得妖狐異香。創白蓮教。自稱聞香教主。就其徒設大小頭目及會主之號。蔓延直隸山東山西河南陝西四川各省。後森被捕死獄中。

子好賢及鉅野徐鴻儒武邑干宏志輩踵行其教。徒黨益衆。無何。好賢鴻儒等約於其年中秋同起兵。會謀洩。鴻儒等遂先期反。自號中興福烈帝。舉兵陷鄆城。連陷鄒滕嶧三縣。卒爲官軍長圍。食盡。黨徒皆降。鴻儒以單騎遁。亦被擒。磔於京師。臨刑歎曰。吾王好賢父子經營二十年。徒黨不下二百萬。事之不成。天也。

經此大敗後。白蓮會銳氣盡挫。李自成及其餘諸雄。四分五裂。卒爲滿清所乘。等閒大好河山。輕易付之借箸之間。良可歎也。

清四世至乾隆。明察沈毅。嚴禁白蓮教。然白蓮教起事者仍累世不絕。乾隆四十年。白蓮會首劉松者。以祈禱及符咒治病。頗著聞。派密使傳教於西部諸省。事發流甘肅。後其徒劉之協宋之清等。煽誘陝西四川湖北人民。嘯聚衆黨與舉兵。際乾隆治世。卒無效。

劉之協奉王發生者。詭稱爲明裔朱姓。藉以煽誘世俗。乾隆五十八年。事覺被擒。王發生以年幼。免死。戍新疆。劉之協遠遁。令州縣大索不獲。荊州宜昌等地。株連羅織數千人。於是聶傑人張世謀等起荊州。姚之富齊林之妻王氏等起襄陽。四川孫士鳳徐天德王三槐冷天祿等。一時並起。陝西張士龍張

漢潮張天倫之徒亦起事。一時西部諸省。望風而靡。嘉慶五年。劉之協再被擒。然一波未平。一波又起。亂滅於此而旋起於彼。迄無寧歲。

擾攘者及十年。至嘉慶七年。始全行底定。生靈塗炭者數十萬。政府耗戰費二億兩。嘉慶十八年。北京宮禁中。又猝起大變。事爲一種天理教徒所謀畫。而白羽會三香會八卦教等。咸歸向而贊助之。自徐鴻儒以來。政府嚴禁白蓮教。不知其餘黨仍別立諸種名目以相淆。天理諸教。名稱雖異。實皆白蓮之餘緒也。

此變首謀者。係河南李文成山東林清二教徒所爲。二人者。以觀天文能豫言人事稱。上下多尊信之。於是林清賄通內監。誘致其黨於宮禁。約與山東河南同時起事。九月十六日。林清飾其黨二百餘人爲農夫。潛自宣武門入內城。身懷武器。混酒肆中。日晡乃直犯東西華兩門。各以首蒙白巾爲號。太監劉金等引其東。高廣福等引其西。閻進喜等爲內應。林清徒黨得內監爲嚮導。知已在大內之西。誤自尙衣監文穎館內犯。侍衛急閉隆宗門。不得入。倉皇失措。紛亂間。迷於所向。時適仁宗幸木蘭。仁宗第二子（卽道光皇帝）偕諸太監登垣瞭敵。命急取槍至。顧內監咸與教徒通。所與皇子槍無實彈。俄

見手白旗。攀垣踰養心門進者。皇子取槍射擊之。未命中。怪而察之。知係空彈。因急取衣服間銀釧作丸。再擊之。應聲斃。教徒不敢踰垣進。將火崇文門。會諸王大臣率禁兵由神武門入。敗教徒於中正殿門外。所有私通之內監。悉就擒。薄暮大雷雨。有教徒數人震死武英殿御河。餘黨盡奔竄。林清匿北京數里外之黃村。候進止。且冀山東河南黨蜂起爲變也。適有點慧之太監。探知林清匿黃村。驅車逆之。詭賀其事之成。僞謂宮已破。急待首領之至。議進兵計。林清信其言。偕馳北京。中途知爲所紿。然覺醒已晚。卒被擒。

河南滑縣知縣強克捷。偵知李文成之隱謀。捕置之獄。斷其脛。黨衆知謀洩。且聞首領之罹慘刑也。咸不平。教徒三千人羣起謀變。戕知縣。劫李文成於獄。據滑縣。其他黨之散在山東河南各地者。亦羣起戕官奪城。顧李文成脛創甚。不克自臨陣。但命其黨據連河險要道口鎮。扼餉道以制北京之死命。且以便號召黨徒焉。

是時楊遇春討平劉之協。駐節陝西。政府飛召之還。楊遇春至衛輝。卽自率親兵八十。由連河西進。窺道口。遇教徒數千。擊走之。擒斬二百餘人。教徒遁歸道口。楊遇春自督戰。攻道口。教徒望見輒靡。未幾

復道口。焚殺近萬人。繼又擊破桃源賊三千。進圍滑縣。山東鹽運使劉清。直隸總督章照。率大兵赴援。合圍之。滑縣。古滑州舊治也。城極堅。外砌厚磚。內壘厚土。中實以沙。駕大礮攻之。礮彈遇沙輒止。不易破。且教徒自占道口後。屯聚之糧支一載。城中無敢爲內應者。官軍乃圍其三面。惟北面以隔葦塘缺之。桃源黨首劉國明潛入城。迎李文成自北門遁。官軍追擊。伏騎兵於白土岡。殲其徒二千。文成知不免。縱火自焚死。

官軍乘勢攻滑縣。用火藥炸西南城破之。城遂陷。黨首牛亮臣徐安國等就擒。城中良民二萬餘。多有爲官軍虐殺者。

翌年。陝西白蓮教亦被官軍擊破。散之四方。自是白蓮會之名無聞。今其教徒雖有存者。特其分支緒餘耳。

先是。白蓮會外。尙有各支派。嘉慶十三年。仁宗上諭中有曰。

江南、安徽、河南、山東、毗連各州縣。多有無賴棍徒。拽刀聚衆。設立順刀會、虎尾鞭、義和拳、八卦教諸名。橫行鄉曲。欺壓良善。既有此等匪徒。自應嚴行懲辦。以靖閭閻。不可養癰貽患。云云。

嘉慶二十年。那彥成查辦教匪奏疏有曰。滑縣鬧事三人。俱係震卦教。凡在教者。均稱爲東方震宮王老爺門下。其王老爺係首先傳教之山東荷澤縣人王中。已於乾隆三十七年犯案正法。林清黨多係坎卦教。凡在教者。均稱爲北方上坎宮孔老爺門下。其孔老爺係首先傳教之山東寧縣人孔萬休。亦已於王中案內正法。至大乘教。金丹八卦教。義和門如意門等教。凡在教者。均稱爲南方離宮頭殿真人部老爺門下。其部老爺係首先傳教之河南商邱縣人部生文。已於乾隆三十六年犯案正法。又訊有清門教。係滑縣人王正紀所傳。當時拏獲辦理。訊係兗州石佛口王姓分支。應卽飭令密記存查。臣於到任後。查辦各項教匪。夙夜實力整飭。不敢稍存疎懈。斷不肯令邪教復萌。再釀鉅案。除陸續拏獲滑縣潛逃從逆名犯。並林清案內應行緣坐餘黨不斂外。其離卦一教。仍未改悔之案。青縣李八葉福明等。傳習義和門教一案。又青縣邊二。傳習白陽教。預知逆情一案。景州葛錫華等。從習離卦教。預知逆情一案。祁州那士魁。傳習如意教。搜獲妄造表名掛號總冊一案。故城縣葛立業。傳習義和門拳棒。預知逆情一案。均經訊明。教名雖別。俱係離卦教之子孫徒黨。逐件奏明。分別凌遲斬遣在案。現又訪獲青縣尤明等。傳習義和門離卦教一案。亦經奏明嚴行究辦云云。

觀此足知當時實有無數教會。輒近義和團之起源。蓋由來遠矣。

光緒二十三年。大刀會頭目劉士端。彭桂林。趙天吉等。憤耶穌教之跋扈。集黨毀山東兗州府之耶穌教堂。戕德國教徒二人。大刀會者。亦白蓮會之分支。首謀就擒後。德國藉口租膠州灣。復由清政府償卹費二萬四千兩。賠築教堂費六萬六千兩。膠州灣租借期爲九十九年。兼讓以膠州灣至濟南府之鐵道敷設權。沿鐵道之鑛山。並准其開掘。

後又有小刀會者。亦白蓮會之分身也。以德國占據膠州灣爲名。藉口禦侮。希圖起事。游勇響馬。到處嘯聚。四出劫掠。致書德國軍營。約期與戰。德國電總理衙門。政府則大驚。急命山東巡撫加意嚴防。漸亦無事。

蓋白蓮會之徒。向祇與北胡反抗。自耶穌教案起而反抗洋人。遂肇義和團之亂。

光緒二十六年。義和團起事。義和團亦白蓮會之支流。號稱能以念誦咒語避礮彈。以傳習拳棒爲宗旨。旗幟有扶清滅洋等語。蔓延山東直隸各地。毀耶穌教堂。虐殺耶穌教徒。其在北京者。則圍困公使館。八國聯軍入援。事後。清政府賠各國兵費至四億五千萬兩之鉅。

後更有在理教。亦白蓮會之支流。蔓延河南直隸山東滿洲各地。其教之起在清初。其祖曰楊萊如。字佐臣。初名存仁。後世誤爲羊誠證。明萬曆進士。山東萊州府即墨縣蕭何村人。明亡後。從勞山程揚旺學道。揚旺號道義。別號合元子。道學龍門派。相傳龍門派第十二代弟子。卽邱真人派。萊如旣學道。居雲莫山。三年。似有所悟。返家修行。一日。自言見聖宗下降渡化。遂稱得道。龍門派以老子爲教祖。是爲第一代。聖宗爲尹禧。卽關尹子。爲第二代。邱處機號長春真人。字通密。山東棲霞人。生於金熙宗時。得道崑崙山。爲第三代。後萊如傳道燕齊間。得大弟子八人。遂立在理教。嘉慶間。設公所於天津梁家咀子。所謂在理者。言在儒佛道三教之理中。奉佛教之法。修道教之行。習儒教之禮。其宗旨以正心修身克己復禮爲本。其習俗戒酒而不禁茹葷。謂戒煙酒則其性不亂。身體日健。鮮魚肥肉。所以適口。吾人當修心。不必不修口腹也。不設像。不焚香。多用咒歌偈語。衆以其禁煙酒有益習俗也。入者漸多。勢以益盛。今滿洲馬賊多屬是教。去歲。革命黨張繼宋教仁至滿洲。齋書連絡。與季逢春朱二角金壽山王飛卿楊國棟孟福亭藍黑牙等三十頭目盟。其書曰。

某某英雄麾下。聞公等聚義遼海之間。以扶弱抑強。抗官濟民爲志。敵處前有同人。曾與公等握

手歸來述其事。竊幸同氣不孤。欣慰無極。雖然則有一二爲公等告者。馬軍之起。幾三百年矣。推其聚義之始。實在明末。蓋以明時盜賊蜂起。政府誅求無厭。民不聊生。於是北方豪傑。乃互相團結。人自爲守禦盜賊。抵抗貪官污吏。以圖身家之安。其本旨固在保全人民。排斥暴政。非若綠林暴客。以劫殺焚掠爲事比也。及清兵入關。代主中國。乃益肆爲暴虐。屠戮人民。搜括財產。酷法虐政。橫征苛斂。較明季猶甚。於是馬軍團體。反抗政府日益力。而北方人民之相率投馬軍。以圖安身者日益多。馬軍與政府。幾成不兩立之勢。相持至於今日。遂有公等之盛。此僕等所爲中國慶幸者也。然歷時既久。宗旨漸忘。各部散居。不相統一。欲圖大業。勢不可成。以故黨羣雖多。仍與綠林無異。今政府視公等。不過爲寇盜者流。蓋其心實有所輕視耳。夫大丈夫處世。當立無上之威名。受百世之崇拜。豈可爲人輕視耶。況公等祖宗。受政府之殘殺特甚。復仇之心。人所共有。天經地義。所不能外。今以有用之人材。而無合一之團體。不圖大舉之方。不知進取之策。此亦可爲公等痛惜者矣。或以清廷官軍。精練難禦。不敢輕於發亂。不知校量武材。官軍不及馬軍遠甚。特彼之軍隊較多。此之團體殊單。寡不敵衆。故皆有所忌憚耳。若統集遼河東西黑水南北之義軍。合